

Regional News Unit AIR Aizawl
Friday, May 24, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Vawk pulhri African Swine Fever avangin kumin hian Mizoram chhungah vawk 961 an thi tawh ni a report a ni.
- Kumin chhungin Aizawl Traffic Police ten lirthei dan bawhchhiatnaa an man tam ber chu a dahna hmun ni lo a lirthei dahte an ni.
- Chhatisgarh ah Maoist hel pasarih kahhlum an ni
- Department of Telecommunication chuan ramchungah mobile connection lem nuai 6.80 a awm tih a sawi



ASF RESURGENCE

Vawk pulhri African Swine Fever (ASF) avangin kumin hian Mizoram chhungah vawk 961 an thi tawh ni a report a ni a, ASF vanga vawk suat tawh zat chu 1,315 a tling tawh bawk.

Animal Husbandry & Veterinary Dept in a chhinchhiah danin nimin khan ASF vangin vawk 45 a thih belh leh a, nimin vek hian vawk 11 suat a ni. Nimin khan Tuirial khua-ah vawk 30 a thi a, Thingsulthliah khua-ah 6 thi-in Khawzawl district-a Dulte khua leh Thingsul Tlangnuam-ah 3 ve ve a thi a. Zemabawk-ah 2 leh Ramhlun Sports Complex-ah 1 a thi bawk a ni. Nimin vek khan Khumtung-ah vawk 9 suat a ni a, Chhingchhip-ah pahnih tihlum a ni bawk. Kuminah hian district 6-ah ASF vawk pulhri hi a leng mek a. ASF hri lenna ni a AH and Vety department-in an puante chu Aizawl, Champhai, Lunglei, Saitual, Khawzawl leh Serchhip district te a ni a. District dang zawng - Siaha, Lawngtlai, Kolasib, Mamit leh Hnahthial te chu vawk pulhri lakah hian an la him rih ni a ngaih a ni.

Aizawl khawpui a veng thenkhat, ASF lenna a puante chu hlih a ni leh tawh chungin veng hrang hrang chu hri lenna hmuna puan belh a ni a. Chutiang bawkin Aizawl district leh district danga khaw engemaw zat chu vawk pulhri lenna khua-a puan belh mek a ni.



WEATHER

Bay of Bengal tuipua thlipui immun mek chu cyclone ah insiamin naktuk atangin West Bengal leh Bangladesh vel a hrut chhoh rin a ni a, he cyclone hian Mizoram chhim lam leh khawthlang lam a hrut tel ve rin a ni.

Aizawl Meteorological Centre Director Sudheer Kumar Dwivedi-a chuan naktuk atangin ruah a sur nasat theih thu leh thlipui nen a thawh theih thu a sawi a, Lunglei, Lawngtlai, Siaha ah te chuan ruah bakah thli hi darkar khata km 50/60 a chak a thawh theih thu a sawi a ni.



TRAFFIC OFFENCES

Kumin chhungin Aizawl Traffic Police ten lirthei dan bawhchhiatnaa an man tam ber chu a dahna hmun ni lo a lirthei dahte an ni.

He thu nimina Akashvani Aizawl-in a kawmnaah Traffic Sherista Pu Lalawmpuia chuan sawiin kumin January atanga April thla thlenga Dan bawhchhia lirthei man zat chu lirthei sangthum za sawmruk pariat a ni, a ti a. Dan bawhchhiatna avanga pawisa chawi tling khawm chu cheng nuai sawmhni pakhat sangriat sangriat zali a ni a. Tun hnaiah lirthei a dahna lo a dahte an man hnem ber thu a sawi a ni.

Aizawl khawpui chhunga Traffic sign hrang hrang zingah Zebra crossing chu mipuiin an zawm that thu leh Traffic light chu mipuia Inzirtirna tha zawk a awm rih loh avangin an la kalpui thei lo niin Pu Lalawmpuia chuan a sawi bawk a ni. Traffic Sign hrang hrang thawmthat ngaite pawh a hranpa a donation an nei loh avangin thawmthatna hna an kal chakpui theih loh thu a sawi a.

Chawlhni tinin hmun lun laiah Mobile Checking an kalpui thu leh a inkar thlakin Aizawl khawpui daifemah a bikin an dap thin thu a sawi a. Thla khatah vawi khat zan lama endik hna zan dar 10 atanga zing dar 3 an kalpui thin thu a sawi bawk. Pu Lalawmpuia chuan Aizawl Municipal Corporation (AMC) in demarketed parking area a siamah chauh lirthei din phal a nih thu leh chumi hmun lo a lirthei dahte chu man an nih thin thu a sawi bawk a ni.



POLICE FRANCHISE

Mizoram Police silai keng 1,047 awmna company 15, state pawna inthlan venhimna hna thawka kalte chuan vote an thlak ve thei dawn lo tih a chiang tawh.

Chief Electoral Officer (CEO) pisa chuan hemi chungchangah hian Election Commission of India lamin Bihar, Uttar Pradesh leh Madhya Pradesh a inthlanna a duty Mizoram Police-te chuan vote an thlak a remtih loh thu a tichiang tawh niin an sawi a. Ministry of Home Affairs-in ruahmanna a siam angin Bihar leh UP a duty turte hi March ni 28 leh 29 khan an duty-na lam pan turin rel hmangin an chhuak tawh a. March ni 30 tlai lamah chauh Mizoram Lok Sabha biala ding tur tihchian a nih avangin postal ballot hmanga vote an thlak theihna tura an puala Facilitation Centre siam hman a ni lova. An duty-na tur hmun pana April ni 3-a rel hmanga chhuak MP a duty turte tana Facilitation Centre siam phalna ECI-a CEO pisa-in a zu dilna pawh April ni 8-ah chauh chhanna hmuh a nih avangin vote thlak lovin an kal ta a ni.

CEO pisa atanga thudawn danin hemi hnu hian Mizoram Police mi 1,047-te'n an duty-na hmun theuh atang tal a postal ballot hmanga vote an thlak phalna an zu dil pawh Mizoram April ni 19-a vote thlak a nih tawh avangin Election Commission chuan a rawn hnawl a. Hemi avang hian Mizoram pawna inthlan duty-a kal State Armed Police Force (SAPF)-te chuan Mizoram Lok Sabha inthlanna-ah vote an thlak ve thei dawn ta lo a ni. Political party thenkhat chuan hei hi pawh an tih thu sawiin Mizoram ang vote nei nuai 8 chuang hret chauh awmna-ah chuan inthlan result tidanglam pha niin an ngai a. Chubakah vote tlak chhiat chhanah an puh bawk a. Kumina Mizoram Lok Sabha bial inthlanna-ah khan vote za zela 56 pont 87 chauh a tla a, hei hi hun hma lam ngaihtuah chuan a tla chhe hle a ngaih a ni.



REFUGEES

Chin state hmar lam Tonzang leh Cikha khua a Myanmar sipai Hmunpuite Chin National Army (CNA) leh an thawhpui PDF pawl hrang hrangin an lak hnu-a indona kal zelah Mizoramah raltlan an la pun belh zel.

Nilaini khan Myanmar raltlan 3 chu Zokhawtharah an rawn luh belh a, nimin tukah mi 12 chu Saitual district-ah an rawn luh belh leh bawk. Thawhlejni atanga nimin tuk thleng khan raltlan hi 70 an lo lut a, an zinga 61 hi Myanmar atanga lo lut an ni a. Thawhlejni a lo lut thar mi 44 te hi Hakha, Khawmawi, Falam, Tedim, Tahan , Tuingo leh Khampat atanga lo lut an ni hlawm a Champhai district a Zokhawthar-ah an la khawsa rih a. Midang 14 lo lutte chu Saitual district-ah an awm mek thung. 'Mipui tangruai sipai' an tih maite'n Chin state hmar lam khaw engemawzata Myanmar sipai camp an lak hnu hian Myanmar indo thlawhnate chuan helai bial vel hi a bomb zui zel a. Tonzang leh Cikha khua bakah Lungtak leh Phaitu-ah pawh bomb an thlak nasa hle a, bomb thlak avang hian biakin tiamin in 40 aia tlem lo a chhia ni a thudawn a ni a. Nilaini zan dar 11 thleng khan silai ri a la reh lo niin an sawi bawk. Tonzang vela bomb thlak a nih avang hian Khawmawi leh Rikhawdar khawmite chu ralkhelin Nilaini chawhma khan Zokhawtharah mi tam tak an rawn tlan lut a. Chawhnu lamah erawh chuan an kir leh vek ni a thudawn a ni.

Hetihlai hian Thawhlejni chawhnu lam khan Bangladesh atangin Lawngtlai district a Hmawngbu khua-ah chhung khat raltlan mi 3, an lut a. Nilaini zing khawvar hma khan mi 6 dang an lo lut leh bawk.

Chin state hmarlama inbeihna nasa tak avang hian May ni 16 atanga Thawhtanni thleng khan raltlan 938 chu Champhai district-a Vaikhawtlang, Khuangphah leh Hnahlan-ah te an lo lut a. Hemi rual hian mi 168 chu Saitual district a Teikhang, Kawlbem leh Mimbung khu-ah te an lut bawk a. Chin state chhim lam Vairum, Salachhuah, Laty, Bakla, Piedo, Bakalei leh Tisavai khua atangte in raltlan 198 zet Siaha district-ah lo lutin Laki, Lomasu leh Lopu khua-ah te an awm mek bawk.

Anni hi Maraland Defence Force (MDF) leh Chinland Defence Force (CDF-Mara) te inngirngona boruak a san tak avanga rawn tlan chhia ni a thudawn a ni. Chin state chhim lam tho Paletwa khua leh a chhehvel atangin Khumi hnam mi 22-te chu Lunglei district-a Khawmawi khua-ah an rawn ral tlan bawk a. Anni hi Arakan Army hel pawlin an tihbuai thin vanga rawn tlan chhia ni a hriat a ni. Heti hian Mizoramah Myanmar atanga rawn ral tlan hi nimin thleng khan mi 35,500 an tling tawh ni a chhut a ni.

<><><>

MAOIST KILLED

Chhatisgarh ah Maoist hel pasarih kahhlum an ni. Police te sawidanin Bastar division-ah nimin khan police leh Maoist te hi an inkap a. Poice te hian Narayanpur leh Nadtewada district inrina lai Abujmad ngaw chhungah Maoist te an awm tih thu an dawn hnuah security force te Maoist dapchhuah beihpui an thlak nghal a. Moaist te hian lo lambunin an inkap zui nghal a. Maoist pasarih kahhlum an ni a, hei bakah ihan midang engemawzat an hliam bawk nia thudawn a ni a. Inkahna hmunah hian ralthuam thahnem tak Police ten an man bawk a ni.

<><><>

TELECOMMUNICATION

Department of Telecommunication chuan ramchhungah mobile connection lem nuai 6.80 a awm tih a sawi. Telecommunication Department chuan operator te chu heng mobile connection lemte hi chhui chhuak vat turin a hriattir a. Telecommunications Service Provider te chu ni 60 chhungin an hnuaia connection ennawn vek tura hrilh an ni tih a tarlang a. Finfiah theihlohte chu an connection ti tawp tura tih an ni bawk.

